

MENDRANZES

Provincia e Region adum per la mendranzes

L'Autorità per la mendranzes linguistiche del Trentin à prejentà la relazion su la situazion del 2018 per la mendranzes del Trentin, metan al luster i ponts de forza e chi de debolezza

L'Autorità per la mendranzes linguistiche de la Provincia de Trent, che tol ite l president Dario Pallaoro, la avvocat ladin Luciana Rasom e chela cimbra Giada Nicolussi è ruèda al 5° an de sie mandat. Se trata de n organism metù sù da la Lege Provinzièla per la mendranzes nr 6 del 2008 che fèsc referiment al Consei Provinzièl, l resta en cèria 7 egn e l'è stat metù sù per vardèr e valutèr la ativitàes che vegn portà inant te la trei comunanzes de mendranza linguistica ladina, mochen e cimbra che è sul tegnir trentin, e veder la percacenza e la pertinenza de la scomenzadives metudes en doura, apede che controlèr che la normes de stravardament de la mendranzes aproèdes tant a livel local che naziònel e internaziònel, les vegne metudes en doura da duta la istituzions.

Enstadi l'Autorità à prejentà la relazion anuèla su la situazion de l'an 2018, descheche è pervedù da la L.P 6/2008 jà recordèda, vardan

la situazion no demò dal pont de veduda provinzièl, ma ence con n eie ascort a n coordinament regionèl per la mendranzes, descheche era stat pervedù da la Lege Regionèla nr 3 del 2018 voluda e prejentèda da l'assessor fascian Giuseppe Detomas, e n eie al Comun General de Fascia, a chel che ge pervegn la gestion de la azions per l stravardament de la mendranza ladina de Fascia, zenza desmentier la istituzions educatives, scolastiches e culturèles. La scontrèda de prejentazion anuèla, pissèda per portèr dant la relazion ai componenc del Consei provinzièl e ai raprezentanc istituzionèi e culturèi de la mendranzes, la è stata averta dal salut del President del Consei provinzièl Walter Kaswalder e l'è vedù la partezipazion de desvalives esponenc politics, anter chisc la Procuradora e senatora fascèna Elena Testor, l conseier provinzièl ladin Luca Guglielmi, l'assessor regionèl

ladin Manfred Vallazza e desvalives ombolc e raprezentanc istituzionèi de la mendranzes.

Kaswalder, dajan l benvegnù a duc tel Palaz Trentini, l'è palesà sodesfazion per la bela prejenza, sottrissan l'emportanza che la istituzions sie vejines ai teritories, en particolèr de chi de mendranza, che l'è la pruma rejon de l'autonomia spezièla del Trentin.

Ge vel lurèr su la toponomastica

L President de l'Autorità Dario Pallaoro à dapò uzà fora vèlch aspet critich, metan al luster olache fossa de besegn de n sforz maor per arjonjer resultac miores. Aon na legislazion per la mendranzes anter la miores de la Tèlia-l'è dit-ma mencia n bon coordinament anter i sogec che se cruzia de chisc temes. Per miorèr fossa de besegn prum de dut de potenzièr l Servije Mendranzes de la Provincia, che l'aea n ruol

emportant de coordinament e referiment che ti ultimes egn se à smendrà semper de più. L'è passà 13 egn da l'ultima analisa su la situazion di lengac mendres-à dit amò Pallaoro-e fossa ora de fèr n'otra verifica con criteries scientifices, per veder coche la è dò a jir e se l'è besegn de mudèr vèlch e meter a jir de neva strategies.

L gran lurier fat da la Scoles di raions de mendranza per l svilup e l smaorament de la cognoscenza di lengac mendres te sia comunanzes l'è un di ponts de forza de la politica linguistica, ma contra, amancol ti raions de mendranza mochen e cimbra, resta l problem del spopolament.

Pallaoro à dapò uzà fora l besegn de se der jù a na vida più ativa en cont de la toponomastica vardan de meter sù la Comiscions pervedudes olache amò no les è e de les chiamèr ite e les fèr lurèr olache les è jà states nominèdes. Per chel che vèrda l Comun General la relazion segnala ence l problem de coordinament col Servije provinzièl per la segnaletica su la strèdes e la mencia de adempiment de vèlch Comun de Fascia a la indicazions toponomastiches metudes dant.

L debatit

L debatit è stat caraterisà soraldut dai intervenc di raprezentanc cimbres e mochen, che i à sottrissà l besegn de fèr sinergia per troèr soluzions al

smendrament demografich de sia comunanzes, enceben che sie stat fat de gregn vèrsc inant ti ultimes 10 egn, ruan a aer l tas de spopolament mender de duta la Èlpes. L'ombolt de Palai en Bersntol (Palù del Fersna) Stefano Moltrer à sottrissà ampò che no semper i intervenc economics à valuta ence per l stravardament e svilup de lengaz e cultura de la mendranzes.

Tem del debatit ence la costion de la gestions sozièdes, defat a desferenza che te Fascia, olache l'ambit tol ite duc e demò i Comuns ladins, ti etres raions i Comuns mochen e cimbres se troassa a cogner fèr gestions sozièdes con Comuns no de mendranza, con problemes per la doura del lengaz te l'aministrazion e ence per l'aplicazion de la normes per la prezedenza.

L'assessor regionèl Manfred Vallazza à palesà sia desponibilità a lurèr adum anter Region e Provinzie per la valorisazion de la mendranzes e per sostegnir la scomenzadives portèdes dant da l'Autorità e paroles de desponibilità de l'esecutif provinzièl per portèr inant duta la azions che serf per l stravardament de la mendranzes è ruèdes a inom del goern del Trentin dal vizepresident de la jonta provinzièla Mario Tonina. L conseier ladin Luca Guglielmi à metù l'azent sul besegn de «vener» miec l valor de la mendranzes linguistiche, no demò a livel turistich ma ence anter i trentins. LG



Luciana Rasom, Walter Kaswalder, Dario Pallaoro e Giada Nicolussi endèna la prejentazion de la relazion anuèla.



Raprezentanc politics e esponenc de la mendranzes à empienì la sala de Palaz Trentini en ocazion de la prejentazion.